



KOSOVO SPECIALIST CHAMBERS
DHOMAT E SPECIALIZUARA TË KOSOVËS
SPECIJALIZOVANA VEĆA KOSOVA

Numri i lëndës: KSC-BC-2020-06

Prokurori k. Hashim Thaçit, Kadri Veselit, Rexhep Selimit dhe Jakup Krasniqit

Vendosi: Gjykatësi i Procedurës Paraprake

Gjykatës Nikola Giju

Administratore: Dr. Fidelma Donlon

Data: 14 maj 2021

Gjuha: Anglishte

Klasifikimi: Publik

Urdhër për Caktimin e Datës së Konferencës së Pestë mbi Ecurinë e Çështjes dhe Paraqitjen e Parashtrimeve

Prokurorit të Specializuar
Xhek Smith

Mbrojtjes së Hashim Thaçit
Dejvid Hupër

Mbrojtjes së Viktimave
Sajmon Loz

Mbrojtjes së Kadri Veselit
Ben Emerson

Mbrojtjes së Rexhep Selimit
Dejvid Jang

Mbrojtjes së Jakup Krasniqit
Venkatesvari Alagendra

GJYKATËSI I PROCEDURËS PARAPRAKE,¹ në bazë të nenit 39(13) të Ligjit për Dhomat e Specializuara dhe Zyrën e Prokurorit të Specializuar ("Ligji") dhe rregullës 96(1) të Rregullores së Procedurës dhe të Provave para Dhomave të Specializuara të Kosovës ("Rregullorja"), lëshon këtë urdhër.

I. HISTORIKU PROCEDURAL

1. Më 26 tetor 2020, Gjykatësi i Procedurës Paraprake konfirmoi aktakuzën kundër Hashim Thaçi, Kadri Veselit, Rexhep Selimit dhe Jakup Krasniqit (individualisht "z. Thaçi", "z. Veseli", "z. Selimi", "z. Krasniqi", dhe bashkërisht "Mbrojtja").²
2. Më 18 nëntor 2020, në bazë të urdhrit të Gjykatësit të Procedurës Paraprake për caktimin e datës,³ u mbajt konferenca e parë mbi ecurinë e çështjes.⁴
3. Më 23 nëntor 2020, Gjykatësi i Procedurës Paraprake lëshoi Vendimin Kornizë mbi Nxjerrjen e Provave dhe Çështje të lidhura me Të ("Vendimi Kornizë mbi Nxjerrjen e Provave"), në të cilin përcaktoi parimet për nxjerrjen e provave ndërmjet palëve, kalendarin e nxjerrjes së provave që vazhdon deri në korrik 2021, si dhe sistemin e redaktimit për t'u zbatuar në këtë çështje gjyqësore.⁵
4. Më 17 dhjetor 2020, në bazë të urdhrit të Gjykatësit të Procedurës Paraprake për caktimin e datës,⁶ u mbajt konferenca e dytë mbi ecurinë e çështjes.⁷

¹ KSC-BC-2020-06, F00001, Kryetarja, *Vendim për Caktimin e Gjykatësit të Procedurës Paraprake*, 23 prill 2020, publik.

² KSC-BC-2020-06, F00026/RED, Gjykatësi i Procedurës Paraprake, *Version i Redaktuar Publik i Vendimit mbi Konfirmimin e Aktakuzës kundër Hashim Thaçi, Kadri Veselit, Rexhep Selimit dhe Jakup Krasniqit*, 26 tetor 2020, publik; KSC-BC-2020-06, F00045/A03, Prokurori i Specializuar, *Aktakuzë e Redaktuar më Tej*, 4 nëntor 2020, publike.

³ KSC-BC-2020-06, F00074, Gjykatësi i Procedurës Paraprake, *Urdhër për Caktimin e Datës së Konferencës mbi Ecurinë e Çështjes dhe Paraqitjen e Parashtrimeve*, 11 nëntor 2020, publik, me Shtojcën 1, publike.

⁴ KSC-BC-2020-06, Transkripti i seancës, 18 nëntor 2020, publik.

⁵ KSC-BC-2020-06, F00099, Gjykatësi i Procedurës Paraprake, *Vendim Kornizë mbi Nxjerrjen e Provave dhe Çështje të lidhura me Të*, 23 nëntor 2020, publik, para. 99.

⁶ KSC-BC-2020-06, F00130, Gjykatësi i Procedurës Paraprake, *Urdhër për Caktimin e Datës së Konferencës së Dytë mbi Ecurinë e Çështjes dhe Paraqitjen e Parashtrimeve*, 8 dhjetor 2020, publik, para. 19(a).

⁷ KSC-BC-2020-06, Transkripti i seancës, 17 dhjetor 2020, publik.

5. Më 16 shkurt 2021, në bazë të urdhrave të Gjykatësit të Procedurës Paraprake për caktimin e datës,⁸ u mbajt konferenca e tretë mbi ecurinë e çështjes.⁹
6. Më 12 mars 2021, Gjykatësi i Procedurës Paraprake lëshoi Vendimin për Kategorizimin e Provave sipas Rregullës 109(c) dhe Çështje të lidhura me Të ("Vendimi sipas Rregullës 109(c)"), në të cilin urdhëroi kategorizimin e materialit të rregullës 102(1)(b) sipas rrethanave të çështjes dhe zgjati afatin për dorëzimin e atij materiali deri më 23 korrik 2021.¹⁰
7. Më 24 mars 2021, në bazë të urdhrit të Gjykatësit të Procedurës Paraprake për caktimin e datës,¹¹ u mbajt konferenca e katërt mbi ecurinë e çështjes ("Konferenca e Katërt mbi Ecurinë e Çështjes").¹²
8. Më 15 prill 2021, Gjykatësi i Procedurës Paraprake lëshoi vendim ku konstatoi se, në këtë fazë të procesit, ishte e parakohshme të caktohej data për dorëzimin e dosjes paraprake të ZPS-së dhe materialit në lidhje me të.¹³
9. Më 7 maj 2021, Administratorja njoftoi Gjykatësin e Procedurës Paraprake për caktimin e Sajmon Loz si mbrojtës të viktimave.¹⁴

⁸ KSC-BC-2020-06, F00185, Gjykatësi i Procedurës Paraprake, *Urdhër për Caktimin e Datës së Konferencës së Tretë mbi Ecurinë e Çështjes dhe Paraqitjen e Parashtrimeve*, 3 shkurt 2021, publik; F00193, Gjykatësi i Procedurës Paraprake, *Urdhër për Ndryshimin e Datës së Konferencës së Tretë mbi Ecurinë e Çështjes*, 9 shkurt 2021, publik.

⁹ KSC-BC-2020-06, Transkripti i seancës, 16 shkurt 2021, publik.

¹⁰ KSC-BC-2020-06, F00218, Gjykatësi i Procedurës Paraprake, *Vendim për Kategorizimin e Provave sipas Rregullës 109(c) dhe Çështje të lidhura me Të*, 12 mars 2021, publik, para. 22.

¹¹ KSC-BC-2020-06, F00227, Gjykatësi i Procedurës Paraprake, *Urdhër për Caktimin e Datës së Konferencës së Katërt mbi Ecurinë e Çështjes dhe Paraqitjen e Parashtrimeve*, 17 mars 2021, publik, para. 16.

¹² KSC-BC-2020-06, Transkripti i seancës, 24 mars 2021, publik

¹³ KSC-BC-2020-06, F00247, Gjykatësi i Procedurës Paraprake, *Vendim mbi Kërkesën e Mbrojtjes në lidhje me Dosjen Paraprake të Prokurorisë*, 15 prill 2021, publik, para. 8.

¹⁴ KSC-BC-2020-06, F00282, Administratorja, *Njoftim për Caktimin e Mbrojtësit të Viktimave për Grupin 1 të Viktimave Pjesëmarrëse në Proces*, 7 maj 2021, publik, para. 6, me Shtojcën 1, konfidenciale dhe *ex parte*.

II. DISPOZITAT LIGJORE PËRKATËSE

10. Sipas rregullës 96(1) të Rregullores, pas konferencës së parë mbi ecurinë e çështjes gjyqësore, Gjykatësi i Procedurës Paraprake mbledh konferencat vijuese mbi ecurinë e çështjes, në qoftë se e gjykon të nevojshme për: (i) organizimin e shkëmbimeve midis palëve dhe, kur është e zbatueshme, mbrojtësit të viktimave, për të mundësuar përgatitje të shpejta për gjykim; (ii) ndërmarrjen e hapave për të siguruar se palët po i kryejnë të gjitha përgatitjet e nevojshme në kohë dhe në mënyrë të zellshme; dhe (iii) rishikimin e ecurisë së çështjes dhe që palëve, e kur është e zbatueshme mbrojtësit të viktimave, t'u jepet mundësia për të ngritur probleme në lidhje me çështjen gjyqësore.

11. Sipas nenit 21(6) të Ligjit, i gjithë materiali dhe provat ose faktet relevante në posedim të Zyrës së Prokurorit të Specializuar të cilat janë në favor ose kundër të akuzuarit i vihen në dispozicion të akuzuarit para fillimit të procesit dhe gjatë procesit, vetëm me kufizimet rreptësisht të domosdoshme dhe me zbatimin e masave mbrojtëse kompensuese të nevojshme. Sipas rregullës 102 (3) të Rregullores, ZPS-ja i jep njoftim të hollësishëm Mbrojtjes për çdo material dhe provë që ka në zotërim.

12. Sipas rregullës 95(4) të Rregullores, Gjykatësi i Procedurës Paraprake urdhëron ZPS-në që brenda një afati të përcaktuar të paraqesë: (i) dosjen paraprake, ku përfshihet çfarëdo pranimi në lidhje me faktet nga ana e Mbrojtjes dhe një listë e pikave të pakontestuar; (ii) listën e dëshmitarëve që synon të thërrasë; dhe (iii) listën e provave materiale që synon të paraqesë, ku përfshihet, kurdoherë që është e mundshme, çfarëdo kundërshtimi i Mbrojtjes lidhur me autenticitetin e tyre.

13. Sipas rregullës 95(5) të Rregullores, pas dorëzimit të materialeve të përmendura në rregullën 95(4) të Rregullores, Gjykatësi i Procedurës Paraprake fton Mbrojtjen që brenda një afati të caktuar të dorëzojë dosjen paraprake . Gjithashtu, brenda një afati të përcaktuar nga Gjykatësi i Procedurës Paraprake, Mbrojtja informon ZPS-në për synimin e vet për të përdorur alibinë ose çfarëdo arsye tjetër që përjashton përgjegjësi

penale, ndër të cilat aftësia mendore e kufizuar, ose mungesa e aftësisë mendore, intoksikimi, domosdoshmëria, shtrengimi dhe gabimet faktike ose ligjore.

14. Sipas rregullës 96 (2) të Rregullores, me pëlqimin me shkrim të të akuzuarit që merret pas këshillimit me mbrojtësin, konferenca mbi ecurinë e çështjes mund të mbahet: (i) në praninë e të akuzuarit dhe me pjesëmarrjen e mbrojtësit nëpërmjet videokonferencës; (ii) në praninë e mbrojtësit dhe me pjesëmarrjen e të akuzuarit nëpërmjet videokonferencës; ose (iii) në mungesë të të akuzuarit, me praninë e mbrojtësit ose pjesëmarrjen e mbrojtësit nëpërmjet videokonferencës. Gjithashtu, çdo kërkesë për pjesëmarrje në konferencën mbi ecurinë e çështjes nëpërmjet videokonferencës i paraqitet drejtpërdrejt Administratores, në përputhje me Udhëzuesin e Punës të Administratores për Videolidhjet (KSC-BD-23/COR), paraprakisht e në kohë të mjaftueshme, në mënyrë që Administratorja të ndërmarrë hapat e duhur, ku përfshihet edhe informimi i Gjykatësit të Procedurës Paraprake.¹⁵

III. DISKUTIM

15. Pasi ka shqyrtuar preferencat për datat të shprehura nga palët, Gjykatësi i Procedurës Paraprake cakton që konferenca e pestë mbi ecurinë e kësaj çështjeje gjyqësore të mbahet të mërkurën, më 19 maj 2021, në orën 11:00.

16. Gjatës seancës, Gjykatësi i Procedurës Paraprake do t'u kërkojë palëve përditësime, nëse kanë, për pikat ende të pazgjidhura nga Konferenca e Katërt mbi Ecurinë e Çështjes, si dhe për parashtimet me shkrim dhe me gojë që kanë dorëzuar lidhur me ato pika. Në veçanti, dhe krahas kësaj, Gjykatësi i Procedurës Paraprake do të kërkojë përditësime në lidhje me pikat në vijim, sipas radhës së përcaktuar më poshtë:

¹⁵ *Shih gjithashtu KSC-BC-2020-06, F00062, Gjykatësi i Procedurës Paraprake, Vendim për Autorizimin e Pjesëmarrjes përmes Videolidhjes, 6 nëntor 2020, publik, para. 10; F00069, Gjykatësi i Procedurës Paraprake, Vendim për Autorizimin e Pjesëmarrjes përmes Videolidhjes, 9 nëntor 2020, publik, para. 9.*

(1) Nxjerrja e materialeve:

- a. Nëse ZPS-ja e ka përfunduar nxjerrjen e materialit të mbetur që u është treguar secilit prej të akuzuarve gjatë intervistave përkatëse të tyre me ZPS-në;
- b. Çfarë përparimi është bërë në nxjerrjen e materialit të rregullës 102(1)(b) prej ZPS-së në kuadër të afatit 23 korrik 2021, e në veçanti, edhe sa nga ky material mbetet për t'u nxjerrë dhe nëse ZPS-ja parashikon të dorëzojë kërkesa të tjera për masa mbrojtëse për materialin e rregullës 102(1)(b) deri më 4 qershor 2021;
- c. Nëse palët po përballen me ndonjë vështirësi lidhur me kategorizimin e materialit të rregullës 102(1)(b) sipas rrethanave të çështjes në sistemin elektronik *Legal Workflow*, të urdhëruar në Vendimin sipas Rregullës 109(c);
- d. Nëse ZPS-ja do të arrijë t'i dorëzojë Mbrojtjes njoftimin e hollësishëm të provave të rregullës 102(3) të Rregullores brenda të premtës, 25 qershor 2021;
- e. Nëse ka ende prova shfajësuese në ruajtjen, kontrollin apo në dijeninë faktike të ZPS-së që duhet t'i nxirren Mbrojtjes sipas rregullës 103 të Rregullores, dhe nëse pritët të bëhet ndonjë kërkesë për masa mbrojtëse në lidhje me këtë material;
- f. Nëse palët po përballen ose parashikojnë të përballen me ndonjë vështirësi sa i takon materialit të rregullës 107, dhe nëse pritët të bëhet ndonjë kërkesë sipas kësaj rregulle;

(2) Kundërshtimet e Mbrojtjes lidhur me pranueshmërinë e provave të rregullës 102:

- a. Nëse Mbrojtja synon të kundërshtojë pranueshmërinë e provave të nxjerra sipas rregullës 102 të Rregullores, sikurse parashihet në rregullën 95(2)(e) të Rregullores, dhe nëse po, brenda cilit afat;

- b. Nëse kundërshtimet mund të paraqiten në format të një tabele, ku të përfshihet informacion lidhur me (i) numrin ERN të provës përkatëse; (ii) numrin e paketës së materialit të nxjerrë; (iii) rregullën në bazë të së cilës është nxjerrë prova përkatëse; dhe (iv) natyrën e kundërshtimit;

(3) Hetimet e ZPS-së dhe hapat e mëtejshëm:

- a. Nëse ZPS-ja mund të japë përditësim të mëtejshëm për datën e parashikuar të përfundimit të hapave hetimorë të papërfunduar;
- b. Nëse është ende i vlefshëm parashikimi i ZPS-së (java e dytë e shtatorit 2021) për dorëzimin e dosjes paraprake dhe materialit në lidhje me të sipas rregullës 95(4)(a)-(c) të Rregullores;

(4) Hetimet e Mbrojtjes dhe hapat e mëtejshëm:

- a. Nëse Mbrojtja mund të japë informacion të mëtejshëm mbi ecurinë e hetimeve të saj;
- b. Po ashtu, nëse Mbrojtja mund të japë më shumë informacion lidhur me synimin për të bërë kërkesa për mundësi hetimore të vetme sipas rregullës 99(1) të Rregullores;
- c. Nëse Mbrojtja mund të japë më shumë informacion lidhur me synimin për të përdorur alibinë ose çfarëdo arsye tjetër që përjashton përgjegjësinë penale sipas rregullës 95(5) të Rregullores, si dhe çdo nxjerrje shoqëruese materiali, sipas rregullës 104(1) dhe (2) të Rregullores;

(5) Pikat juridike dhe faktike për të cilat palët pajtohen:

- a. Nëse palët presin të jenë në gjendje të identifikojnë një listë pikash për të cilat pajtohen dhe një listë pikash për të cilat nuk pajtohen, në veçanti, nëse

Mbrojtja i qëndron ende mendimit se nuk mund të arrihet marrëveshje derisa të jenë dorëzuar dosjet paraprake.

17. Së fundi, palëve dhe pjesëmarrësve do t'u kërkohet të japin mendimet e tyre lidhur me datën për konferencën e ardhshme mbi ecurinë e kësaj çështjeje gjyqësore.

18. Palët dhe pjesëmarrësit ftohen të paraqesin parashtrime me shkrim, nëse dëshirojnë, lidhur me cilëndo nga pikat e mësipërme. Në rast se palët ose pjesëmarrësit dëshirojnë të ngrenë ndonjë pikë tjetër në konferencën e ardhshme mbi ecurinë e çështjes, e cila nuk është përfshirë në këtë urdhër, atëherë ftohen t'i përfshijnë ato pika në parashtrimet e tyre me shkrim. Palët dhe pjesëmarrësit ftohen t'i paraqesin këto parashtrime deri të martën në mesditë, 18 maj 2021.

IV. VENDIM

19. Për arsyet e përmendura më lart, Gjykatësi i Procedurës Paraprake:

- a. **VENDOS** të mbajë konferencë mbi ecurinë e çështjes në prani të ZPS-së, Mbrojtjes së Viktimave dhe Mbrojtjes, **të mërkurën, më 19 maj 2021, në orën 11:00**; dhe
- b. U **KËRKON** palëve dhe pjesëmarrësve të paraqesin parashtrime me shkrim, nëse dëshirojnë, **deri të martën në mesditë, 18 maj 2021**, sikurse përcaktohet në paragrafin 18.

/nënshkrimi/

Gjykatës Nikola Giju
Gjykatës i Procedurës Paraprake

E premte, 14 maj 2021
Në Hagë, Holandë.